

## **Inunnik paasissutissanik suliarinnittarneq pillugu inatsisip Kalaallit Nunaanni atuutilersinneqarnera pillugu peqqussummut eqikkaassut**

Inunnik qarasaasiakkut paasissutissat pillugit inatsit, inunnik paasissutissanik suliarinnittarnermi aamma paasissutissanik taamaattunik pituttorsimangitsumik paarlaasseqatigiittarnermi inuit illersugaanissaat pillugu Europaparlamentip tassanilu siunnersuisoqatigiit peqqussutaannik 95/46/EF-ip, 24. oktober 1995-imeersumik danskit inatsisaanni atuuttumi, paasissutissat elektroniskiusut atorlugit imaluunniit inunnik paasissutissanik elektroniskiunngitsunik nalunaarsuiffimmut ilaangunneqareersunik ilaangunneqartussanilluunniit pisortat inuinnaallu tamakkiisumik ilaannakortumilluunniit suliarinnittarnerannut malitassiivoq.

Peqqussutip kingunerisussaavaa inatsit Kalaallit Nunaanni atuutilissamat ulloq 1. marts 2016-imi, kisiannili inatsimmi § 71 malillugu ullumikkut suliarinninnissanut nalunaarutiginninnerit akuersissutillu aatsaat pisussaapput ukiut pingasut qaangiutinnginneranni.

Inunnik paasissutissanik suliarinnittarneq pillugu inatsisip Kalaallit Nunaannut atuutsilerneqarnera pillugu peqqussutissatut missingiut inunnik qarasaasiakkut paasissutissat pillugit danskit inatsisaannut sanilliullugu arlalinnik allaanerussuteqarpoq. Tamatumani pingaartumik pineqarput allaanerussutit aaqqissuinnermut attuumassutillit imaluunniit malittarisassat Danmarkimit allaanerussut Kalaallit Nunaannut atuuttunerannik peqquteqartumik allaanerussutit inunnik qarasaasiakkut paasissutissat pillugit inatsisip atorneqarneranut pingaarutillit.

Tassunga atatillugu inunnik qarasaasiakkut paasissutissat pillugit inatsimmi tv atorlugu nakkutilliisarneq pillugu kapitali 6-ip, tak. § 1, imm.8, Kalaallit Nunaannut atuutilersinneqassanngitsoq siunnersuutigineqarmat oqaatigineqassaaq, tassa tv atorlugu nakkutilliisarneq pillugu danskit inatsisaat atuuttoq Kalaallit Nunaannut atuutinngimmat. Tamatuma kinguneranik tv atorlugu nakkutilliineq atortut digitaliusut (analogiunngitsut) atorlugit immiunneqartut peqqussummi ilaatinneqarmata aamma pisortat oqartussaasuinut inuinnarnullu malittarisassat assigiinngitsut atuutissapput.

Aammattaaq peqqussutissatut missingiummi peqqussut – Danmarkimi inunnik qarasaasiakkut paasissutissat pillugit inatsisip akerlianik – Kalaallit Nunaanni inunnik paasissutissanik eqqartuussiviit suliarinnittarnerannut atuutissanngitsoq siunniunneqarpoq. Tamatumunnga

pissutaavoq peqqussutissatut missiliuutit tusarniaassutiginiissaanut atatillugu inatsisip Kalaallit Nunaanni eqqartuussivinni atuutilersinnerani ajornakusoorutit arlallit suussusersineqarmata. Aammattaaq inunnik qarasaasiakkut paasissutissat pillugit inatsimmi §§ 54, imm. 1 aamma 65-ip assinganik peqqussutissatut missingiut aalajangersagartaqanngilaq, tamatumalu kingunerisaanik nakkutilliisut Kalaallit Nunaanni suliaat pillugit Datatilsyni Folketingimut ukiumoortumik immikkut nalunaarusiortussaannngilaq aamma suliarinninnerit Kalaallit Nunaanni nalunaarutigineqartut pillugit pisortat allattugaataat tamanut ammasumik nalunaarutigineqartussaannatik. Tamatumunngali taarsiullugu peqqussut malillugu allattugaatit kikkunnit tamanit pissarsiarineqarsinnaasunngortinneqarsinnaapput. Tamatumunnga pissutaapput Kalaallit Nunaanni allattugaatit tamanut ammasumik nalunaarutiginiissaanni suliaat pisariunerat, tamannalu missingiutit tusarniaassutiginnerani Datatilsynip uparuarpaat. Datatilsynip ukiumoortumik nalunaarusiaanut tunngatillugu oqaatigineqassaaq, Datatilsynip maannamut Kalaallit Nunaanni suliaat – nakkutilliisut ullumikkut ukiumoortumik nalunaarusiaanni naammaginartumik annertussuteqartillugit eqqartorneqartussaammata.

Missiliummi saqqummiunneqarpoq inatsit naapertorlugu nalunaarutit saqqummiunneqartut pinermi siullermi Kalaallit Nunaanni atuutilersinneqassanngitsut. Tamatuma kingunerisussaavaa inatsisip atuutilersinneqannginnerani isummerfigineqartussaammata nalunaarutit sorliit – inatsimmi inatsisitigut tunngavissarititaasut malillugit aalajangersakkat naapertorlugit – Kalaallit Nunaanni sunniuteqalertussatut atuutilersinneqartariaqartariaqarnersut aamma pisariaqarpat allannguutit suut allannguutigitillugit.

Oqaatigineqassaaq ullumikkut Kalaallit Nunaanni inunnik paasissutissat suliarineqartarnerat pillugu malittarisassat tamanut atuuttut nassaammata inuinnaat nalunaarsuutaat il.il. pillugit inatsimmi aamma pisortatut oqartussat nalunaarsuutaat pillugit inatsimmi. Tassa malittarisassat taakku missingiut malillugu inunnik paasissutissat pillugit inatsimmi ttaarserneqartussaapput. Tamatumunng apeqatigitillugu oqaatigineqassaaq Namminersorlutik Oqartussat inatsisartut inatsisaatigut inunnik paasissutissat suliarineqartarnerat pillugu malittarisassiorsinnaalissammata, taamaattorli matumani pineqanngilaq naalagaaffimmi oqartussat Kalaallit Nunaanni inunnik paasissutissanik suliarinnittarnerat.